



Impurtant supplement a la communicaziun da medias da la regenza dals 23 da zercladur 2011

Novaziuns concernent l'examen d'admissiun al progimnasi d'ina scola media dal Grischun

Da la revisiun parziala da l'ordinaziun davart la procedura d'admissiun a las scolas medias dal Grischun resultan impurtantas novaziuns ch'èn d'observar l'onn proxim. Perquai ch'il termin d'examen è vegni anticipà e duas linguas chantunalas vegnan resguardadas a la procedura d'admissiun, han ins adattà la materia d'examen e las premissas da reussida, sco er ils termins d'annunzia e lur applicaziun.

L'examen d'admissiun a l'emprima classa dal gimnasi (EA 1G) ha lieu – per motivs organisatorics – il proxim onn da scola gia ils 14 da favrer 2012. Quest'anticipaziun mida las cundiziuns da basa, a las qualas las expertas ed ils experts responsabels han adattà la materia d'examen e las enconuschientschas ch'èn relevantas per l'examen d'admissiun. A basa dal plan da materias reduci, han ins cumplettà l'examen per exempel en il rom matematica cun il champ „quintar fixond a chau“. Ils pensums vegnan dads en scrit, ston dentant vegnir schliads senza nudar las vias che mainan a las soluziuns u resultats intermediars. Las disposiziuns davart las enconuschientschas per il EA 1G vegnan publicadas per tut ils roms sin la pagina d'internet da l'uffizi per la furmaziun media-superiura www.mittelschulen.gr.ch.

Sco ulteriura novaziun en la procedura d'admissiun - ultra da la matematica - na vegn betg pli resguardada be ina, mabain duas linguas chantunalas. L'emprima lingua tschernida vegn sco fin uss examinada en scrit a l'examen d'admissiun. Per la segunda lingua chantunala vala la nota da l'emprim semester da l'ultima classa da la scola cedenta, per regla da la sisavla classa primara. La media da questas duas notas quinta sco nota dal rom d'examen per linguas ch'è relevanta per la decisiun d'examen. Pervia da questas midadas han ins stuì modifitgar las premissas da reussida, uschia che da nov vala l'examen per reussi, sche la media da las notas dals roms d'examen (nota dal rom d'examen matematica, nota dal rom d'examen per linguas, nota d'admissiun) munta almain a 4.5 e sche la summa da las divergenzas da las notas dals roms d'examen sut 4 na munta betg pli che 0.75 puncts.

Sco fin uss è la procedura d'admissiun pir concludida cun success, sch'ins è promovì a la fin da l'emprima classa dal gimnasi ed ina nunpromozion ha sco consequenza in'attribuzion a la scola secundara. Da nov maina ina nunpromozion u ad in'attribuzion provisorica a la segunda classa secundara u sch'ins ha notas da promoziun insufficientas en pli che trais roms centrals (linguas chantunalas, matematica, englais ed instrucziun da la natira) ad in'attribuzion definitiva a l'emprima classa secundara. Las directivas adattadas concernent la midada dal progimnasi al stgalim superiur da la scola populara chattais Vus sin la pagina d'internet www.mittelschulen.gr.ch.

Sco gia quest onn pon ins er en il futur s'annunziar a l'examen be per internet. Spezialmain èsi d'observar ch'ils termins d'annunzia scadan e perquai na pon annunzias retardadas betg pli vegnir resguardadas.

Ulteriuras infurmaziuns pertutgant ils examens d'admissiun ed indicaziuns detagliadas pertutgant la procedura d'annunzia electronica vegnan publicadas avant il cumenzament da l'onn da scola 2011/12 sin la pagina d'internet www.mittelschulen.gr.ch.

23 da zercladur 2011/jus